

ÅRSMELDING 2020 FOR LEIKARRINGEN I BONDEUNGDOMSLAGET I OSLO

1. Melding frå styret i Leikarringen

1.1 Styret i Leikarringen 2020

Leiar:	Audun Grüner-Hegge
Nestleiar:	Solveig Brekke Hauknes
Styremedlem:	Aleksander Breiby Herseth (skrivar)
Styremedlem:	Simon Hesselberg Løvald (pengestyrar)
1. varamedlem:	Gyda Gaarder Tøraasen
2. varamedlem:	Synnøve Bryde

1.2 Årsmøtet

Årsmøtet vart halde i Lagsrommet tysdag 25. februar 2020. 14 personar deltok på møtet, der alle var røysteføre medlemer av Leikarringen.

1.3 Styrearbeid

Styret møttest til fyrste styremøte etter årsmøtet 17. mars 2020. Styret har hatt 6 styremøte i 2020, nokre fysiske men flest digitale møte. Elles har styret kommunisert kontinuerleg via e-post, Facebook og møte i høve øvingar og annan aktivitet. Den viktigaste jobben ved styrearbeidet er framleis hyppige møte med medlemene og tilrettelegging for tysdagsøvingane. I 2020 fekk styret også servert ei ekstra utfordring med koronapandemien. Styret har prøvd å gjere det beste ut av situasjonen, men synes naturleg nok at 2020 har vore eit ekstra utfordrande år både med tanke på rekruttering, kreativitet og motivasjon for å halde aktiviteten i gong i slike usikre tider.

1.4 Informasjon

Styret har i hovudsak kommunisert med medlemer og andre interesserte gjennom Facebooksida vår (facebook.com/Leikarringen), Facebook-gruppa (Leikarringen <3) og Instagram-profilen (instagram.com/leikarringen), men også via Leikarringen si heimeside (leikarringen.bul.no) og noko på e-post.

Medlemssystemet Styreweb vert brukt av heile laget og har for Leikarringen letta arbeidet med å ha oversyn med medlemene, og letta kommunikasjon i nokre høve.

1.5 Heiderslagsfolk

Det har i 2020 ikkje vore utnemnd nye heiderslagsmedlemer i Leikarringen, men vi er stolte over at Edvard Lauen, tidlegare leiar i Leikarringen og noverande medlem, i 2020 vart utnemnt som heiderslagsmedlem i hovudlaget vårt BUL Oslo.

1.6 Heidersmerke

Styret har ikkje delt ut heidersmerke i 2020.

1.7 Medlemstal

Her syner medlemstal ved utgangen av året for 2020 og statistikk for dei siste åra.

2020	2019	2018	2017	2016	2015	2014	2013	2012	2011	2010	2009	2008
122 (+ 21 under 18 år)	124 (+ 16 under 18 år)	116 (+12 barn)	104 (betal- ande)	114*	112	98	104	110	102	111	118	139

1.8 Ombod frå Leikarringen

Bunadnemnda:

Sigrid Kjøbli

Anne Cathrine Johansen

Åse Wethal Holen

Valnemnda:

Anbjørg Myhra Bergwitz

Henrik Kamphus

Torbjørn Bergwitz Lauen

Rådet i Leikarringen:

Rune Hernes Bjerke

Anbjørg Myhra Bergwitz

Karianne Johansen

Lasse Pettersen

Anne Cathrine Johansen

1.9 Øvingar

Fysiske øvingar i Leikarringen (tysdagar)

Øvingane våren 2020 vart haldne i Teatersalen i Rosenkrantz gate 8, tysdagar kl. 19:30–21:30. Vi rakk å ha øvingar fram til og med 10. mars før COVID-19 stengte ned for all aktivitet. Etter sommaren fekk vi lov å starte opp øvingar innanfor gjeldande smittevernregler med god avstand og ellers strenge smitteverntiltak. Haustens øvingar vart også noko oppstykkja grunna smitteverntiltak, men vi fekk gjennomført fysiske øvingar fram til november.

Det har vore viktig for styret å tilby aktivitet gjennom året og pandemien, sjølv om vi ikkje kunne samlast på vanleg vis til pardans og ubegrensa tal deltakarar.

Vi har gjennom året nytta både våre eigne medlemmer samt eksterne som instruktørar, og hatt mange dyktige musikarar innom øvingane våre. For vårens øvingar har vi vore mellom 20 og 38 personar på øvingane, med eit snitt på 27 stk. For haustens øvingar var det ikkje tillatt med meir enn 20 personar på kvar øving grunna smittevern.

Desse har vore **instruktørar** på dei fysiske tysdagsøvingane i 2020:

Marianne Dahl, Bente Syvertsen, Lene Magnussen, Jonny Haugen, Johanna Bruun Arnesen, Torbjørn Bergwitz Lauen, Thomas Nilssen, Svein Are Sirirud Vatnehol, Vegar Vårdal, Simon Hesselberg Løvald, Audun Grüner-Hegge og Jon Bugge Mariussen.

Desse har vore **musikarar** på dei fysiske tysdagsøvingane i 2020:

Jon Hjellum Brodal, Bjørn Kåre Odde, Hilde Fjerdingsøy, Elise Tegnér, Ingeborg Ulberg Sommer, Trygve Liahagen og Henrik Kamphus.

Tema for dei fysiske tysdagsøvingane har vore:

Oppstart med runddansar, danseteknikk, folkeswing, senjapols, polsdans frå Stangnes, Agder spesial med runddansar og turdansar, masurka, springdans frå Nordre Sunnmøre, velkomstøving med smittevernvenlege øvingar, danseteknikk og linedance, halling, menuett og linedance og songdans.

I tillegg til desse øvingane har **songdansgruppa** haldt fram med øvingstid frå 18.45-19.30 på tysdagar, før danseøvinga som starter direkte etterpå. Her har ei gruppe på ca. 10 personer møtt kvar gong, men det er rom for fleire. Det er i hovudsak Torbjørn Bergwitz Lauen som har hatt ansvar for denne gruppa. Øvingane for songdansgjengen vart også påverka av COVID-19 og har hatt øvingar når situasjonen har tillette det.

Digitale aktivitet

I periodane då koronapandemien har stengt for at vi kunne treffast fysisk til fritidsaktivitetar har vi i 2020 prøvd oss på eit par digitale nyvinningar. Vi har saman med dyktige og kreative Vegar Vårdal fått til totalt fire digitale alternativ til øvingar i Leikarringen i 2020.

Den fyrste digitale hendinga skjedde allereie 24. mars, knappe to veker etter den fyrste nedstenginga av samfunnet. Vegar ga oss ei fantastisk digital øving direktesendt på Facebook som vi kalla "Folket dansar online". Det var mange personar som fulgte strømminga og på det meste var vi oppe i 200 personar som fulgte med samtidig. Dette var stor stas.

Hausten 2020 ville vi legge til rette for meir opplæring av historie, sjangrar og områder innan folkedansen i landet. Då la vi opp til ei tredelt rekke med webinar kalla "Folkedansen i Noreg". Dei tre webinarar hadde undertitlane "Flatfeledistrikt", "Hardingfeledistrikt" og "Tidslinje". Det var Vegar Vårdal som stod for planlegging, innhald og gjennomføring av desse tre webinarar, i samarbeid med oss. Desse vart også strømma direkte på Facebook for å nå ut til flest mogleg. Vi er godt nøgde med å ha testa ut nokre ulike moglegheiter for digital danseaktivitet og er glade for all den gode responsen.

Avslutningar

Etter ein amputert vårsesong var det fint å kunne treffast fysisk til sommaravslutning 9. juni, utendørs i strålande sol i Frognerparken. Vi haldt god avstand og fekk mellom anna mange gode idear til aktivitetar vi kunne fylle framtidige øvingar med, både med og utan smitteverntiltak. 15. desember vart det for aller fyrste gong skipa ein digital juleavslutning. Det var kjekt å sjå mange gjennom skjermen og vi fekk også fylt kvelden med mange fine aktivitetar. Mellom anna fekk vi følge julebakst minutt for minutt, vi fekk høyre ei nylaga juleforteljing, det var quiz og vi mimra litt frå året som hadde gått. Sjølv om øvingane og den ordinære aktiviteten i 2020 ikkje vart heilt som normalt ser vi at det er viktig med sosiale treffpunkt slik som sommar- og juleavslutningar for samhaldet i laget.

Øvingar i BULder og Brak og TrøBUL

Øvingane våren og hausten 2020 vart haldne tysdagar i Teatersalen/Lagsrommet i Rosenkrantz gate 8. Vi har også haldt fram med øvingar med TrøBUL, vår eiga barnegruppe. Desse øver tysdagar kl. 17-18, medan BULder og Brak frå kl. 18-20. Øvingane til desse to gruppene har også vore påverka av restriksjonar og nedstenging knytt til COVID-19, men dei har i noko større grad kunne treffast enn dei ordinære tysdagsøvingane. Det har også vore arrangert online-øvingar for BULder og Brak over plattformen Zoom enkelte tysdagar.

Desse har vore instruktørar i BULder og Brak i 2020: Anita Vika Langødegård, Nikolaj Bo Fischer Nielsen, Jon Bugge Mariussen, Simon Hesselberg Løvald, og Audun Grüner-Hegge, Neri Bakkjen, Ulf Arne Johannesen og Håkon Odden.

Instruktør for TrøBUL har vore Ingeborg Solheim-Allen og Marta Lindvik for våren 2020 og Ingrid Skrindo for hausten 2020.

Søndans/stildansar:

Sjå eiga melding frå Søndansen i punkt. 3.

1.10 Framsyningar, sosialt og kurs

17. mai

17. mai vart også prega av COVID-19 med strenge restriksjonar. Men vi fekk til noko aktivitet likavel, både digitalt og i bybildet.

- I forkant av den store dagen hadde styret kledd seg opp i finstasen og spelt inn nokre videohelsingar som vart publisert både før og på sjølve nasjonaldagen.
- Sidan vi ikkje fekk samlast for å danse opp Karl Johans gate sendte vi kl. 09:15 eit gjensyn med dansen frå fjoråret som ein film på Facebooksida vår.
- I løpet av dagen la vi opp til at medlemmar kunne dele bilder og filmar med kvarandre i Facebook-gruppa vår for å vise korleis dei markerte dagen.
- I samband med Oslo kommune hadde BULder og brak spelt inn ein video der dei dansa halling gjennom Oslo sentrum. Denne vart publisert på Facebook og kommunens heimesider på nasjonaldagen.
- I tillegg hadde fleire dansarar frå BULder og brak fått i oppdrag av Oslo kommune å bidra med pop-up-dans nokre utvalde stader i byen. Dette vart eit populært innslag for dei heldige som fekk sjå hallingdansarane i aksjon.
- På ettermiddagen fekk bebuarar på Ensjøtunet besøk av dansarar frå eit par kohortar i Leikarringen, tradisjonen tru.
- For å avslutte dagen vart det også invitert til digital kviss på kvelden. her deltok kring 15 personar.

17. mai 2020 vart annleis, men trass situasjonen er vi godt nøgde med resultatet og set pris på at kommunen framleis ser verdien av samarbeidet med oss.

Kven Veit?

Leikarringen deltok i kunnskapstevlinga "Kven veit", ei intern tevling mellom lokallag i Noregs Ungdomslag. Hovudlaget stod som lokal tevlingsleiar. Tevlinga gjekk over tre kveldar, og eit vekslende tal medlemmer (om lag 5-10 pers kvar gong) deltok, fordelt på to lag. Dei to laga endte på ein 25. og 36. plass.

Sosiale aktivitetar

I mangel på danseøvingar, dansefestar og sosiale samkomer vart det teke fleire initiativ til å samlast utanom øvingstider i løpet av året. I juni vart det invitert til grilling på Kråkstad, i august vart det skipa hyttetur til Bondehytta og i desember vart det gjennomført fottur i marka.

Kurs

Leikarringen ynskja å støtte opp om og oppmode medlemer til å delta på kurs og kompetansehevande tiltak i endå større grad enn før, men grunna det spesielle året med lite kursaktivitet vart det berre gjeve ei kursstøtte i 2020. Leikarringen støtta Ånund Myhren si deltaking for instruktørkurs med fordjuping i pardans skipa av Noregs Ungdomslag i januar 2020.

Folkedanskveldar i BLS

Etter eit opphald med å vera arrangør for folkedanskveldar i BLS har Leikarringen i 2020 bidrege som arrangør ein sundagskveld, 20. september. Det har vore Gunnar Rogneflåten som har vore ansvarleg frå Leikarringen si side. Han fekk med seg tre andre personar i nemnda, både nye og gamle personar i Leikarring- og folkedanskveld-samanheng. Det var Bærum spelemannslag som var musikarar denne kvelden. Gunnar leia nokre musikkdansar og Torbjørn leia songdans. Dansen vart elles gjennomført med omsyn til smittevernreglane.

Skogfinsk kulturkveld

Grunna koronanedstenging våren 2020 vart det skogfinsk kulturkveld (Peli poikki) i Teatersalen 24. oktober 2020. Leikarringen stilte med tre par i kvar si kohoort som dansa finnskogpols. Dette passa godt inn i programmet der det vart innlegg, diktopplesing, foredrag, song og musikk som hadde rot i det skogfinske. Ein full teatersal i smittevernsråda si anda, med god mat frå dei djupe skogar i aust.

GNIST-prisen

I oktober vart Leikarringen overraska på ei øving med overrekking av den gjeve Gnist-prisen. Dette er ein pris oppretta av FolkOrg og Gnistfonden for unge som går til eit lag som arbeider med opplæring i folkedans for barn og unge. Det var stor stas å motta prisen og ei kjekk anerkjenning å få for det arbeidet vi i Leikarringen legg ned. Ein stor takk til FolkOrg, Gnistfonden og til alle som legg til rette for og deltek på aktiviteten i laget.

I samband med utdelinga vart det også laga ein film av styremedlem i FolkOrg, Thor Hauknes, som vi anbefalar alle å sjå. Filmen finnast på Facebooksida vår, på YouTube og på nettsida vår.

BULder og Brak

I 2020 har BULder og Brak vore ei aktiv framsyningsgruppe. Gjennom året har gruppa hatt 2 betalte oppdrag og eit frivillig. Desse omfattar ei rekke mindre framsyningar i eit samarbeid med Riksscenen gjennom NRK-prosjektet Sangfoni, 17. mai framsyningar og ei videoinnspeling med Daniel Grindeland, ein breakdansar frå den norgeskjente gruppa "Absence Crew". BULder bidro til årets 17. mai-innslag på oppdrag frå Oslo kommune. I tillegg til å spele inn ein video i anledning feiringa gjorde dei også flere "pop-up" opptredener rundt om i Oslo for å spreie 17. mai-stemming til Oslos befolkning, trass dei gjeldande restriksjonane. BULder gjorde også ei framsyning på Riksscenen i samband med ei framsyning som skulle promotere unge talenter. Under kveldens tittel "KVA FRAMTIDA BYR PÅ FOR DEN SCENISKE FOLKEDANSEN: DRIV, VILDE WESTENG OG UNGE FOLKEDANSERE" opptrådte BULder saman med fleire andre unge lovande dansarar på scenen.

1.11 Utsendingar

Landsmøte i Noregs Ungdomslag - Anbjørg Myhra Bergwitz (i tillegg var Fredrik Hope påmeld, men måtte melde avbod)

Årsmøte i BLS - Olav Kårevik

1.12 Medlemer i Leikarringen med verv i andre sentrale posisjonar

- Torbjørn Bergwitz Lauen sit som leiar i Noregs Ungdomslag.
- Øystein Gammersvik sit som leiar, Klas Ekeland, Anne Cathrine Johansen, Rune Bergwitz og Astrid Skrindo sit som styremedlemer i styret for Bondehytta.
- Gunnvald Grønvik er styremedlem, Anne Cathrine Johansen sit som 1. varamedlem og Anbjørg Myhra Bergwitz som 2. varamedlem i styret i Bondeungdomslaget.
- Karianne Johansen i Rådet i Bondeungdomslaget, medan Olav Kårevik er 1. varamedlem
- Solveig Brekke Hauknes og Rita Sirirud Vatnehol er tilsett i Noregs Ungdomslag som rådgjevarar innan kultur (folkedans + teater og bunad)
- Rune Bergwitz er varamedlem i Styret i Norsk Barneblad
- Gunnvald Grønvik og Anne Cathrine Johansen er hhv. medlem og vara i Rådet i Norsk Barneblad
- Gunnvald Grønvik er i styret i Den mangfaldige scenen AS

Oslo, 18. februar 2021

For styret i Leikarringen,

Audun Grüner-Hegge (sign.)

2. Melding frå Rådet i Leikarringen

Rådet i Leikarringen har etter årsmøtet i Leikarringen i 2020 hatt denne samansetjinga:

Karianne Johansen, Anne Cathrine Johansen, Anbjørg Myhra Bergwitz, Lasse Pettersen og Rune H. Bjerke.

Rådet har ikkje hatt møte i løpet av 2020. Dei har hatt noko elektronisk kommunikasjon gjennom året. Eitt av temaene har vore framlegget som er lagt fram for årsmøtet om endra kriterium for val av medlemer til Rådet. Om ønskeleg kan Rådet gjere greie for drøftingane andsynes årsmøtet 2. mars.

Bærum, 16. februar 2021

For Rådet i Leikarringen

Rune Hernes Bjerke (sign.)

3. Melding frå Søndansen

I 2020 hadde Søndansen berre to samkomer før korona-restriksjonane kom i mars. Etter det har vi ikkje funne det formålstenleg å samlast. Vi vil ta opp att dansen så snart

vi kan, vonleg til hausten 2021. Vi samlast til vanleg tre timar om lag ein søndag i månaden. 25 medlemer har vore med på øvingane. Spelemann for gruppa er Hans Petter Holen og rettleiar Folke Flateland.

Vi dansar som før mykje kontradans og balldansar frå det norske tilfanget, vi arbeider med dansestil og set dansane inn i ein kulturhistorisk samanheng. Det er med stor glede vi også tar i bruk det nye dansetilfanget som er rekonstruert og publisert dei seinare åra. Fleire frå Søndans-gruppa har vore med å gjere dette materialet tilgjengeleg. Vi legg også vekt på det sosiale med ein god prat til kaffien.

Søndansen og arbeidet med kontradans i Leikarringen gjennom dei siste 40-50 åra har fått god plass i boka som Torun Riise har gitt ut. Boka med tittelen 'Dansen Musikken Gleden' kom ut hausten 2020 og omhandlar Bærum Balselskab og 20 andre historiske dansegrupper.

Det er tatt med eit par fine bilete frå 1977 då Ringen stilte med åtte nye drakter for gutane.

Søndansen er eit tilbod til dansarar i Leikarringen og BUL som vil danse meir enn dansen på tysdagane, eller som ikkje har høve til å vere med då. Det er triveleg om fleire finn vegen til Søndansen i Lagsrommet i Rosenkrantzgate.

Asker, 17. februar 2021

Folke Flateland

4. Melding frå Bunadnemnda 2020

Bunadnemnda var i meldingsåret samansett av Åse Wethal Holen, Sigrid Kjøbli og Anne Cathrine Johansen. Nemnda fekk i oppdrag av årsmøtet 2020 å lage eit oversyn over kva for bunader Leikarringen eig. Rett etter årsmøtet blei Noreg stengt ned på grunn av Covid 19, og smitteverntiltaka som har vore gjennom heile året har gjort at nemnda ikkje har hatt moglegheit til å møtast. Vi freistar å få til dette når smitteverntiltaka blir letta litt og det blir lettare å få tilgang til lagslokala.

For bunadnemnda, Oslo 17/2 2021

Anne Cathrine Johansen